

陳迦陵文集

陳迦陵儷體文集卷七

宜興陳維崧其年誤

無錫秦松齡留仙

選

弟

維岳緯雲

太倉黃與堅忍菴

宗石子萬

男履端

校

姪洵

序

家皇士望遠曲序

和陸麗京計甫草韻幀首
有十三女子繪望遠圖

嘗觀蕩子從軍明鏡有刀環之賦吳姬織素飛龍生藥店
之悲郎食鯉魚之尾授色恩情妾燒玳瑁之簪傷懷訣絕
廬江小吏愁孔雀之東南鄴下名王恨浮雲之西北莫不
手褰寶帳速望人來坐擁金屏恐令春去則有四姓良家

三河妙族幼住石城之下長貯金屋之中趙家姊妹本姓
爲樊楊氏諸姨賜名爲號檀黃染靨人傳巧笑之方石黛
添蛾家有莫愁之曲金蓮擬步誰讓潘妃白雪如人何殊
甘后芙蓉承輔豈煩傅粉之粧蘭麝沾膚奚假薰香之術
螭蟠粉項偏宜白燕雙釵楊柳纖腰解映綠狸重席兄居
協律原識佳人姊在昭陽新稱皇后誠可謂天上無雙官
中第一者也然而棄妾鳳城之南思子狼河之北歲歲征
遼空爲天子年年服散徒作姬人妾齡十五已爲離別之
時郎路三千大有相思之曲看銅街之走馬息意櫻桃聽
珠閣之吹簫忘情荳蔻人傳虎帳新移光祿塞邊客曰牙
旗舊駐臙脂山下粧臺疑惑繡戶徘徊寄摩敦之紫襖心
傷周室之宇文贈妃子以金環目斷齊朝之斛律王孫質

趙何日言歸公子留秦無時云返其人也如此其遠也如
彼於是盤龍縮髻獨上高臺墜馬明粧廣開寶堦青天碧
海竟無桂樹之期白晝黃昏又下蘂砧之淚餘香不斷自
洗滌衣剩粉猶存私留窮袴三春永巷豈有恨於君王萬
里長城復何心於歌舞庶幾化石猶尋道上之夫莫便升
天竟竊月中之藥爰命江南幼女河內嬌娥繪以丹青圖
之紈素紫綃不定竚瓊觀以卷衣羅帶將移睨碧虛而垂
手漢武帝之徬徨帳後是也非耶衛宣姜之髣髴君前天
乎帝矣所以西陵松柏不無歎息之人禾水鴛鴦嗣擬綢
繆之作也吾家閨閣亦有新聲此日封胡遂填別體敢曰
難兄惟法護著此青箱或云愛弟有清河屬之立晏嗟乎
蛺蝶成灰別歡五載珊瑚製枕待子三年處姊尚未適人

小姑何嫌獨處須知新婦難配參軍豈有才人乃歸厮養
抱衾裯於星下誰適爲容浣粉黛於窗前各言其志云爾
香奩上官二序不能獨勝曲終奏雅出乎忠孝使人讀
之慨然

吳梅村先生

作賦之家意在言外不得唱歎餘情卽屬俯仰靡麗其
年留心今古嘗有獨立之時情淡而文此序徵之矣

伊璜評

亦山草堂南曲序

仲弟半雪作亦山草堂其堂名也

今夫銅雀臺南惟餘松柏瓊花觀北不見鴛鴦王孫丁巳國之辰公子正離家之日姚弋仲之悲哀何極疇昔可知毛修之之淪落奚窮生平已矣何況陸機盛齒大去東吳蕭綵麗才長歸北魏賦金蓮之步寧暇言愁歌玉樹之花焉能不恨於是銅街年少爭寄意於才情金埒文人半陶懷於風調擲茱萸而送客自許清狂攀石榴而贈人相傳輕薄羨韓家之椽頗愛熏香問霍氏之奴偏能買酒靡不薔薇作曲體號連環梔子爲篇歌稱碎錦長誇綉虎豈無玉枕之年小字盤龍大有金釵之夜洵足以送愁天上行樂人間矣偶逢養炬亦擅新聲竊喜封胡能爲南撿黃金作軸解過樓前紫玉爲鈴私隨車子南齊范曄琵琶或曰

無雙江表桓伊長笛命爲第一固已城東巧筵曲與人同
河北蛾眉歌將面等嗟乎叔寶情人畏聽金陵之樂牧之
蕩子愁過明月之橋銀雁飄零誰爲供奉翠蟬鳴咽總是
燕支黃羊野馬已知皆河北之人皓齒紅牙何物是江南
之曲況乎關河風月頗足傷心臺榭綺羅都爲觸目徐之
才之帳底淚濕羅巾李商隱之奩前心灰絳蠟五更白馬
偏向人鳴一夜棲鳥又憎人別粉濃袖口想像同心花近
釵頭依稀連理僕本斷腸之輩怯見金荃余尤失志之人
愁親錦瑟歸之予仲序以短章

余澹心鴛鴦湖傳奇序

原夫玉樹歌殘心傷後主霓裳曲冷竟斷明皇紅顏沉戎
馬之中皓齒遭亂離之會怨夫八於花蘼三千歌舞空歸
贈妃子以金鑲十二管絃安在才人結帶應有恨於當年
公主梳頭復何心於今日帳爲玄蛤夜夜多愁席號綠熊
年年是淚加以幼住青樓長家朱雀趙家姊妹皆擅傾城
秦國弟兄俱推巧笑西曲以紅珠代夜南方多白玉爲人
翡翠簾開時招紫燕眞珠船上慣戲文鴛曲瓊以繡線爲
綖綵竿用文椒作檣爐添寶獸偏燒荀令之香瑟隱銀蟬
解作韓娥之曲於是油車雜沓寶馬駢闐明鏡爭開對照
芙蓉之面紫瑜並坐爭歌楊柳之腰十五霍家難倚將軍
之勢三千楚館不知夫婿之名本期雲雨長行常依巫嶺

豈料烽烟不斷頓隔蓬山釵除却月已爲馬上之人袖散
回風便作軍前之客懷中玉笛誰忘舊日之寧王枕底丹
鞋暗泣前朝之李后遇龜年於劍外無非故人紅豆之悲
逢白傳於江州大有知己青衫之感西宮秦曲猶尋故伎
於平康北寺鳴箏尚作新聲於長樂蛾眉失路原同庾信
之哀螭首離家大似江淹之賦固知蠲愁有術難蠲弱女
之愁斷恨有方莫斷降王之恨然而星或謫乎瑤臺珠自
還夫合浦乘龍覓婿卽值征人得意之年躍馬封侯亦自
少婦爲歡之日五銖羅袂依然畫閣之旁百子步搖宛矣
玉釵之側人憐嬌鳥重入金籠客訝名花還歸寶砌誠太
平之盛事亦離亂之良緣則有江東才子河內名家譜以
縈篋度之宮徵何戡在座知是舊人杜牧登筵驚其故態

紅粧薄命祗寓其飄零花月之傷錦瑟芳詞亦寫其潦倒
風塵之色旣已鍾情於蘓州刺史因之屬序於陽羨書生
僕也粉染玄英亦有薜蘿之約香煎蘭葉殊愆荳蔻之期
心如蠟淚徹夜長流情擬蠶絲終朝不竭贈陳王之枕已
悞今生窺賈午之牆還思再世痛踰死別何煩方士之少
君哀甚和親莫怨畫圖之延壽庶幾墳名紫玉永依幼女
之冤酒伴青娥尚感步兵之哭冀君彤管寫我香奩

此為試讀，需要完整PDF請訪問：www.erton.com

曹實庵咏物詞序

霜凋魏帳月中之剝瓦何多水咽秦關地上之殘城不少
天若有情天寧不老石如無恨石豈能言銅駝轂簾恒逢
秋至以偏啼銀雁簷沙慣遇天陰而必出山當雨後易結
修眉竹到江邊都斑細眼溯夫皇始以來代有不平之事
千年關塞來往精靈萬古河山憑陵鬼物縱復人稱恨甚
事奈愁何江淹工愀愴之辭鮑照擅蒼涼之賦正恐世閱
世以成川年復年而作谷捧黎陽之土堙此何窮積函谷
之泥封來不盡然而劍鋒盡缺總爲旁觀壺口新殘只因
細故青史則幾番劉項誠然於我何堪黃河則滿地袁曹
遑曰干卿奚事或蝦蟆陵上暮年紅袖所閒談或鸛雀樓
邊故老白頭之夜話或武擔過客曾看石鏡於成都或蓋

屋居民偶得銅盤於渭水苟非目擊卽屬親聞事皆磊砢
以魁竒興自顛狂而感激槌床絕叫蛟螭天矯於胸中踞
案橫書蝌蚪盤旋於腕下誰能鬱鬱長束縛於七言四韻
之間對此茫茫姑放浪於減字偷聲之下吟成十首事足
千秋趙明誠金石之錄遜此華文郭弘農山海之篇慚斯
麗製嗚呼烟霾天水囂宮旣蔓草千堆浪打章門灌廟亦
殘陽一片悲哉季札劍影徒青迹矣劉郎奩痕尚紫銀槎
泛斗難追博望之勲名彩筆凌雲空羨馬卿之詞賦何況
長平繡鏃恨血全紅大食冰蘂愁雲半黑織成魚素粘海
氣以猶醒掣得龍髯鼓天風而倍怒豈非謔謔出出諾臯
之所未收怪怪竒竒齊諧之所不載者哉僕每怪夫時人
詞則呵爲小道倘非傑作疇雪斯言以彼流連小物之懷

無非淘洗前朝之恨人言燕市實悲歌慷慨之場我識曹
君是文采風流之裔狂歌殿脊聊憑鳳紙以填來老興淋
漓亟命鸞笙爲譜去

錢寶汾詞序

五陵烟月最說長安三輔笙簫尤推鄠杜縣名蓋屋樓前
多織錦之妻殿是馭娑闕下有橫鞭之客於是貂蟬年少
金粉仙郎衛叔寶之體不勝綺羅王夷甫之手詎離珠玉
時則柳衣染綠荔帶垂青鳴箏而過公主之園挾瑟而上
將軍之第臺前放仗見南苑之參差閣下傳餐望西山之
葱鬱李嶠爲秋雁之吟王維有紅豆之作寫之玳瑁知才
子之多情譜以箜篌驗佳人之巧笑然而蛾眉善怨時懷
故里之鶯花蟬鬢工啼恒憶微時之娣姒雲中射雁偏愴
晨風苑後釣魚常悲流水絕憶嵇康之鍛慣思張翰之鱸
是則柳郎中小令麗句雖多牛給事新聲愁端不少者矣
僕類楚狂偶來燕市一聲河滿憐司馬之青衫三疊陽關

羨尚書之紅杏不揣題詞之贈矧當判袂之時逐秋風而
竟去余是愁人望明月以相思君真健者